

ጳውሎሲ ጋላቲያ አሳሰ ጻፊዱ ኪታ ጊዶ ቆፋ

ዬሱሲ አሺዛዴ ጊዲዳይሳ ዮቲዛ ሚሺራቾ ቃላይ ኡባሶን አይዛቤታስ ሳባኬቲን አሳይ አማኒ አማኒ ዳሪሺን፤ «አማኒዛዴ ጊዳናስ ካሴ ሙሴ ዋጋ ፖሊ ናጋናስ ኮሺዜዬ? ኮሺኔ?» ጊዛ ኦይሻይ ዴንዲዴስ፤ ቄሪ ኢሲያ ጌቲቲዛሶን ኦሮሜ ካዎይ ሃሪዛሶን ጋላቲያን ዲዛ አማኒዛ አሳ ጋርሳን፤ «ኣሲ ጸሳ አቻን ጸሎ ጊዳናስ ዬሱሳን አማኖ ጸላ ጊዶንታ ሙሴ ባጋራ ኢሜቲዳ ዋጋዛ ፖሎ ኮሺስ» ጊዲ ጳውሎሳራ ኤቄቲዛይቲ ዳቲስ።

ጳውሎሲ ቃሴ ጋላቲያ ኪታ ጻፊዳይ ሃይሳ ሃ ቲሚርቲዛን ባለቲዳ አሳቲ ቱማ ቲሚርቲኮኔ ቱማ አማኖኮ ዛራናሳ፤ ጳውሎሲ ዬሱስ ኪርሰቶሳ ሃዋሬ ጊዲዳይሳ ቆንጪሴላን ዶሜስ፤ ኢዛ ሃዋሬቲላስ ጴይጊዳይ ጸሳ ኣቲን ኢዚ አሳ ጴይሳን ከቲቶንታይሳኔ ቃሴ ኢዚ ከቲቲዳይ አይሁዳ አሳኮ ጊዶንታ አይዛቤታስ ጊዲዳይሳ ኡባ ቢርሺ ዮቲስ። ዉርሴላ ሸምፖታ ጋርሳን አማኖ ዲሲ ዬሱሳ አማኖን ቤቲዛ ሲቆፔ ጊዲዳይሳ ሎኤሉ ዮቲስ።

ሃ ማጻፋይ ኦይኪዳ ኩሜሳ ቆፋ

ጌሎሶ 1:1-10

ጳውሎሳስ ኢሜቲዳ ሃዋሬቲላ ማታ 1:11—2:21

ጸሳ ኪያቲላ ሚሺራቾ ቃላ 3:7—4:31

አማኒዛይታ ጎቃቲሊኔ አማኖ 5:1—6:10

ኩሻ ቆፋ 6:11-18

¹ ኣሲ ከቲዳዴ ጊዶንታ ዬሱስ ኪርሰቶሳ ሃይቆፔ ዴንሊዳ ኢዛ አዋ ጸሳፌ ከቲቲዳ ጳውሎሳፔ፤

² ታናራ ዲዛ ኢሻታ ኡባፌ ጋላቲያን ዲዛ ዋሳ ኬላታስ፤

³ ኦ አዋ ጸሳፌ ጎዳ ዬሱስ ኪርሰቶሳፔ ጸሳ ኪያቲሊኔ ሳርይ ኢንቲስ ጊዶ።

⁴ ኦ አዋ ጸሳ ሸኔ ጊዲን ኢታ ኣላሜዛፔ ኦና ኣሻናስ ባና ኣሊ ኢሚዳይሳስ፤

⁵ ሜሪፔ ሜርና ጋካናስ ኢዛስ ቦንቾይ ጊዶ።

ሚሺራች ቃላይ ሜጺ ኢሲኖ

6 ኢንቴ ኪርስቶስ ኪያቴላን ጸይጊዳይሳ ኣጋጊዲ ሃራ ዱማ ቫኮ ሚሺራች ቃላኮ ሰሚዳይሲ ታና ዳሮ ማላሊሴስ።

7 ታ ሄሳ ጊዳ ጋሶይካ ኢንቴና ባሌሊዘይቲኔ ኪርስቶስ ሚሺራች ቃላ ሚርቁዛ ኢሲ ኢሲ ኣሳቲ ዲዛ ጊሻሳ፤ ቱማፔ ጊኮ ሚሺራች ቃላይ ኢሲኖ ጸላ።

8 ጊዶ ኣቲን ኑና ጊዲን ወይኮ ሳሎ ኪታንቻ ጊዲንካ ኑ ኢንቴስ ሳባኪዳ ሚሺራች ቃላፔ ሃራ ዱማ ሚሺራች ቃላ ሳባኪኮ ሄሳዴይ ሜርናስ ቃንጌቲዳዴ ጊዶ።

9 ታ ካሴ ጊዳ ማላካ ሃኢካ ዛራዳካ ካሴ ኢንቴ ኤኪዳ ሚሺራች ቃላፔ ሃራ ዱማ ሚሺራች ቃላ ሳባኪኮ ኢዛዴይ ሜርናስ ቃንጌቲዳዴ ጊዶ ጋይስ።

10 ሃኢ ታኒ ኣሲ ታና ኤርሾ! ሃሹ ጋና ማላ ኮያዚናዬ? ጸሲ ሃሹ ጋና ማላ ኮያዚና? ወይኮ ኣስ ኡፋይሳና ኮያዚና? ታ ኣስ ኡፋይሳና ኮይዛኮ ኪርስቶስ ኦሳንቻ ጊዲኬ።

ጸሳን ጳጳሎሳ ጸይጌቲል

11 ታ ኢሻቶ! ታ ኢንቴስ ሳባኪዳ ሚሺራች ቃላይ ኣሳ ኦሶ ጊዶንታይሳ ኢንቴ ኤራና ማላ ኮያይስ።

12 ሃይሳ ሃ ሚሺራች ቃላዛ ዬሱስ ኪርስቶሲ ታስ ቆንጨሲዴስ ኣቲን ታ ኦናፔካ ኤካቤኬ፤ ወይኮ ኦኒካ ታና ታማርሲቤና።

13 ታኒ ካሴ ኣይሁዳታ ኣማኖን ዋና ዲዛኮኔ ጸሳ ዋሳ ኬል ታ ኣይ ማላ ጎዲዳኮ ቃሴ ሙሌራ ጳይሳናስ ታ ኣይ ማላ ዳፊቲዳኮ ኢንቴ ሲዪዳታ።

14 ካሴ ታ ዲዛ ወዴን ዲዛ ዳሮ ኣይሁዳ ኣሳታ ዳርታፔ ኣማኖን ኣጳይስ፤ ካሴ ኑ ኣዋታ ዋጋ ናጋናስ ዳሮ ዳፊታይሲሺን።

15 ጊዶ ኣቲን ካሴ ኮይሮ ታኒ ታ ኣዪ ኡሎን ዲሺን ባስ ዶሪዲ ባ ኪያቴላን ታና ጸይጊዳ ጸሳይ።

16 ኣይዛቤታ ጊዶን ኢዛ ናዛ ጊሻስ ታ ሳባካና ማላ ባ ናዛ ታናን ቆንጨሳናስ ዶሲዳ ጊሻስ ታኒ ኦናራካ ዘሬታቤኬ።

17 ታፔ ካሴ ሃዋሬ ጊዲዳይታኮ ዬሩሳላሚ ባቤኬ ሺን ኣማኒዳ ማላ ሄራካ ኣራቤ ቢታ ባዲስ፤ ሄፔካ ዳማስቆ ሲማዲስ።

18 ሄፔካ ሄዡ ላይሳፌ ጉዬ ጳጳሮሳራ ጋጋናስ ዩሩሳላሚ ባዲስ፤ ኢዛራ ጋጋዳ ታማኔ ኢቻሹ ጋላስ ጋካናስ ሄን ጋሞኣዲስ።

19 ጊዶ ኣቲን ጎዳ ኢሻ ያቆቤፔ ኣቲን ሃዋሬታፔ ኦናካ ቤያቤኬ።

20 ሃይሳ ታ ኢንቴስ ጸፊዛይሳን ታ ዋርዶ ሃሳዮንታይሳ ጸሳ ሲንሳን ዮታይስ።

21 ሄሳፌ ጉዬ ሶሪያኔ ኪልቂያ ጌቴቲዛ ዴሬ ባዲስ።

22 ዩሁዳ ዴሬን ዲዛ ኪርስቶሳን ኣማኒዛ ኣሳይ ታና ቤዩቤና።

23 ጊዶ ኣቲን፡ «ቤኒ ኦና ኣማኖ ጊሻስ ጎዲ ጳይሳና ኮይዛ ኣዴዚ ሃኢ ሄ ኣማኖዛ ዛሪ ሳባኬስ» ጊዛ ዋሬ ጸላ ሲዱዳ።

24 ሄ ኣሳይ ታ ጋሶን ጸስ ጋላቲዴስ።

2

ጳጳሮሳ ሃዋሬቲ ሞኪ ኤኪዳ

1 ታማኔ ኣይዱ ላይሳፌ ጉዬ ቃሴካ ዩሩሳላሚ ባዲስ፤ ሄ ዋዴ ባርናባሳራ ዳይስ፤ ቲቶሳካ ታናራ ኤካ ባዲስ።

2 ታስ ቆንጪዳ ጊሻስ ሄ ባዲስ፤ ኣይዛቤታ ጊዶን ታ ሳባኪዛ ሚሺራቾ ቃላካ ኢስታስ ዮታዲስ፤ ጊዶ ኣቲን ታ ካሴ ማላ ዋጺዳኮ ጋዴኔ ቃሴካ ሲንሳፌ ጮ ማላ ዋጸንታ ማላ ሂርጋዳ ዋናቲዛይታስ ዲማ ኤሪሳዲስ።

3 ሃራይ ኣቶሺን ታናራ ዲዛ ቲቶሲ ኢዚ ጊሪኬ ኣስ ሺን ኢዚ ቃጸሬታና ማላ ዋልቃሊቤቴና።

4 ሃይሲ ሃ ዮኦዚ ዴንዲዳይ ኢሲ ኢሲ ዋርዶ ኣማኒዛይቲ ኦኒ ዩሱስ ኪርስቶሳን ዴሚዳ ጌሻቴላ ዩዩ ዩዩ ፓጪ ቤያናሲኔ ኦና ኣይሌቴላን ዛሪ ጌልላናስ ሎዳራ ኦኮ ሳሊ ጌሊዳ ጊሻሳ።

5 ሃይታ ሄ ኣሳታስ ኦኒ ኢሲቶካ ሃሪቲቤኮ፤ ሄሲካ ኢንቴ ሚሺራቾ ቃላ ቱማቴላን ኤቂ ዳና ማላ ጊዲኮ።

6 ዋና ሚሳቲዛ ኣሳቲ ታስ ኣይኮካ ሚሳቴቴና፤ ጸሲ ኣሳ ኣይፌሶ ቤኢዲ ማዶ ኦሊ ኤሬና፤ ሄይቲ ሄ ኣሳቲ ታ ኪቲዛ ዮኦታስ ታስ ኣይኮካ ጉጂቤቴና።

7 ጊዶ ኣቲን ጳጳሮሲ ቃጸሬቲዳይታስ ሚሺራቾ ቃላ ሳባካናስ ሃዳራ ኤኪዳይሳ ማላ ታኒካ ቃጸሬቶንታይታስ ሚሺራቾ ቃላ ሳባካናስ ሃዳራ ኤኪዳይሳ ኢስቲ ኤሪዳ።

8 ጳጳሮሲ ኣይሁዳታስ ሃዋሬ ጊዲ ኦላና ማላ ኦሊዳ ጸሳይ ታኒካ ኣይዛቤታስ ሃዋሬ ጊዳ ኦላና ማላ ታስ ኦሊዴስ።

9 ዋናቲ ያቆቤይ፡ ጴጽሮሲኔ ዮሃንሲካ ታሰ ኢሜቲዳ ጸሓ ኢሞታ ኣኬኪዲ ታሲኔ ባርናባሳስ ባ ኡቫቻ ኩሼ ኢሚዳ፤ ሄሳፌ ጉዬ ኑኒ ኣይዛቤታስ ኢሰቲ ቃሴ ኣይሁዳታስ ቃላ ዮታናስ ቃላ ኤሮ ጊ ኤኪዳ።

10 ኢሰቲ ኩሰ ሃዳራ ጊዳይ ማንቆታስ ቆፋ ኑ ኣጎንታ ማላ፤ ታ ኣሞይካ ሄሳ ኦላናሳ።

ጳውሎሲ ጴጽሮሳ ቆጴሳ

11 ጴጽሮሲ ኣንጾኪያ ዪዳ ዎዴ ኤሬቲዳ ባላ ኦሊዳ ጊሻስ ታ ኢዛ ቆንጨን ቆጶዲሰ።

12 ኢሲ ኢሲ ኣሳቲ ያቆቤ ኣቻፌ ያናፔ ካሴ ጴጽሮሲ ኣይዛቤታራ ኢሲፌ ካል ሚዛይሳ ኣጊዲ ኣሳቲ ዪዳፔ ጉዬ ቃጻሬቲዳ ኣሳታስ ባቢዲ ኣይዛቤታፔ ሻኬቲ ጉዬ ጉዬ ጉሰ ኦይኪዴስ።

13 ባርናባሲካ ኢሰታሉ ቆጶፔ ቆሞን ሃኖን ኤኬታና ጋካናስ ሃራ ኣይሁዳ ባጋፌ ኣማኒዳ ኣሳይካ ኢዛራ ኢሲፌቲዴስ።

14 ኢሰታ ኦሶይ ሚሺራቾ ቃላ ቱማን ጊዶንታይሳ ታ ኤራዳ ኩሚሳ ኣሳ ኣቻን ጴጽሮሳ፡ «ኔ ኣይሁዳ ኣስ ሺን ኣይዛቤታ ዎጋን ኣቲን ኣይሁዳታ ዎጋን ዳቤካ፤ ሂሰቲን ኣይዛቤቲ ኣይሁዳታ ዎጋ ካላና ማላ ኣዛስ ዎልቃላይ?» ጋዲሰ።

15 «ኑኒ ኑ ዩሉቴላን ኣይሁዳታፔ ኣቲን ኣይዛቤታ ማላ ናጋራንቻ ጊዶኩ።

16 ኣሲ ዩሱስ ኪርስቶሳን ኣማኖን ጸላና ኣቲን ዎጋ ናጎን ጸሎንታይሳ ኑ ኤሮስ፤ ሄሳ ጊሻስ ዎጋ ናጎን ጊዶንታ ኪርስቶሳ ኣማኖን ኑ ጸላና ማላ ኑኒካ ቃሴ ዩሱስ ኪርስቶሳ ኣማኒዴስ፤ ዎጋ ናጎን ኦኒካ ጸላና።

17 «ኑ ኪርስቶሳን ጸላና ኮይኮ ኑኒ ናጋራንቻታ ጊዲዳይሲ ቆንጨ ኤሬቲዴስ፤ ሂሰቲን ኪርስቶሲ ናጋራይ ዳሪ ዳሪ ባና ማላ ኮይኬ? ኮዩና።

18 ታኒ ላሊዳይሳ ዛራዳ ታርካ ታ ኩሼራ ኬጸኮ ታኒካ ዎጋ ሞሪዳዴ ጊዲዳይሳ ኣማኔታይሰ።

19 ታኒ ጸሳስ ዳና ማላ ዎጋ ባጋራ ሄ ዎጋስ ሃይቃዲሰ።

20 ታኒ ኪርስቶሳራ ካቂታዲሰ፤ ሃይሳፌ ጉዬ ታኒ ታስ ዲኬ፤ ጊዶ ኣቲን ኪርስቶሲ ታ ጊዶን ዴስ፤ ሃኢካ ታ ኣሾን ዲዛ ዲሳይ ታና ዶሲዲ ባና ታ ጊሻስ ኣሉ ኢሚዳ ጸሓ ና ቦላ ዲዛ ኣማኖን ዲዛ ዲሳ።

21 ታኒ ጸሳ ኪያቴሉ ካወሽኬ፤ ጸሎቴሉ ዋጋ ናሳን ቤተዛሚሽ ጊዲኮ ኪርስቶስ ሃዳ ሃይቂዴስ ጉሳካ!»

3

አማኖን ዲስ ዋይኮ ዋጋ ናሳ

1 አንቴኖ ዩሺ ቆፖንታ ጋላቲያ ኣሳቶ! አንቴስ ባሌቶንታ ማላ ኢዛ ካቄቴላ ታ አንቴ ሲንላን ሚስሌ ማላ ገጊሳ ቤሳዲስኮ ሺን አንቴና ኦኔ ቢቲዳይ?

2 አንቴ ጸሎ አያና ኤኪዳይ ዋጋ ናንኤዬ? ሳባኬቲዳ ቃላ አማኖኔ? ታ ሃኖ ኢሲኒዮ አንቴፌ ኤራና ኮያይስ።

3 አንቴ ሄሳ ማላ ቆፒ ኤርንታ ኣሴ? ጸሳ አያናን ኦይኪዳይሳ ዛሪዲ አሾ ሃኖን ፖላናስ ዋይቴቲ?

4 ቱሙ አንቴ ሃኖ ጋካናስ ዳቡርዳ ዳቡርሳይ ጮ ሜላ? ጮ ሜላ ጊዲኮ ሃዳ ዳቡርዳታ።

5 ጸሲ አንቴስ አያና አሚዳይኔ አንቴ ኣቻን ማላታ ኦሊዳይ አንቴ ዋጋ ናጊዳ ገሻሴዬ? ዋይኮ አንቴ ሲዪዳ ቃላን አማኒዳ ገሻሴዬ?

6 ኣኔ አንቴ ኣብራሃሜ ገሻስ ቆፒቲ፤ ጌሻ ማጻፋን፡ «ኢዚ ጸሲ አማኒን አማኖይ ኢዛስ ጸሎቴላን ቆይቲዴስ» ጌቲቲ ጸፊቲዴስ።

7 ሄሳ ገሻስ አማኒዛይቲ ኣብራሃሜ ናይታ ጊዲዳይሳ ዋዚናን ዋሊቲ።

8 ኣይዛቤይ አማኖን ኣታናይሳ ኤሪዲ ጸሲ ካሴ ጌሻ ማጻፋን፡ «ዴሬይ ወሪ ኔ ባጋራ ኣንጃታና» ጊዲ ሚሺራቾ ቃላ ኣብራሃሜስ ዮቲ ዋሊዴስ።

9 ሄሳ ገሻስ አማኒዛይቲ ወሪ አማኒዛ ኣብራሃሜራ ኢሲፌ ኣንጃቲዳይታ።

10 «ዋጋ ናሳን አማኔቲዛይቲ ወሪካ ቃንጌላ ጋርሳን ዴቲስ፤ ዋጋ ማጻፋታን ጸፊቲዳይሳ ኡባ ኦሶንታዴይ ኢዚ ቃንጌቲዳዴ» ጌቲቲ ጸፊቲዴስ።

11 «ጸሎ ኣሲ አማኖን ዴኤስ» ጊዛ ገሻስ ኦኒካ ጸሳ ሲንላን ዋጋን ኣቶንታይሲ ጌሻ።

12 ዋጋይ አማኖን ጸጺቤና፤ ጊዶ ኣቲን፡ «ዋጋታ ወርሲ ናጊዛዴይ ኢዚ ናጊዳይሳን ዴኦን ዳና» ጌቲቲዴስ።

13 «ሚላ ቦላ ካቂቲዛ አሲ ቃንጌቲዳዴ» ጌቴቲ ጸፊቲዳ ጊሻስ ኪርስቶስ ኑ ጊሻስ ቃንጌቲዳዴ ጌዲዲ ኑና ዋጋ ቃንጌላፌ ዋዚዴስ።

14 አብራሃሜስ አሜቲዳ አንጆይ ዬሱስ ኪርስቶስ ባጋራ ዴሬስ ጋካና ማላ ኑና ዋዚዴስ፤ ሄሲካ ኑኒ አማኖን ጸሎ አያና ኤካና ማላ ሃኒዴስ።

ዋጋኔ ሂደታ ቃላ

15 ታ አሻቶ! አኔ ታ አንቴስ አሲ ባ ዱሳን ሃኒዛ ሚሽ ለሚሶ አማይስ፤ ሃራይ አቶሺን አሲ ኢሲቶ ጫቂዳ ቃላ ኢሲቶ ጫቂዳፔ ጉዬ ኑኒካ ሻራናስ ዋይኮ ሃራ ኢዛ ቦላ ጉጃና ዳንዳዮንታይሳ ማላ ሃይሲካ ሄሳ ማላ።

16 ጸሲ አብራሃሜስ ዮቲዳ ቃላይ አብራሃሜስኔ ኢዛ ዜሬላሳ፤ ጌሻ ማጸፋይ ዳሮ አሳስ ዮቲዛ ማላ፡ «ኢዛ ዜሬላታስ» ጌና፤ ጌዶ አቲን ኢሲ አሳስ ዮቲቲዛ ማላ፡ «ኔ ዜሬላስ» ጌስ፤ ሄሲካ ኪርስቶስ።

17 ታ ገዛይካ ሃይሳ፤ 430 ላይላፌ ጉዬን አሜቲዳ ዋጋይ ካሰቲዲ ጸሲ ሚንሒዳ ጫቆዛ ላሊዲ ቡሮ ሃናና ሂደታ ቃላ ሻሬና።

18 ላታይ ዋጋን ሃኒዛኮ ሂደታ ቃላን ጌላናስ ኮሼናሺን፤ ጸሲ ባ ኪያቴላ ቃላን አብራሃሜስ አሚዴስ።

19 ሂስቲን ዋጋይ አዛስ አሜቲዳ? ዋጋይ አሜቲዳይ አሳይ ዋጋ ዬጲ አጲዛ ጊሻስ ሄ ኡፋይሳይ ቤሲዛ ዜሬላይ ያና ጋካናሳ፤ ዋጋይ ዬዳይካ ኪታንቻታ ባጋራ ጋና ጌዲዛ ኢሳዴ ባጋራ ዬዴስ።

20 ጌዲኮካ ጋናዚ ኢሳ ባጋ ጸላ ጸሊዛዴ ጌዴና፤ ጸሲ ጌዲኮ ኢሳ ጸላ።

21 ሂስቲን ዋጋይ ሲንላፌ ጸሲ ዋላና ቃላ ዲጊዛዜ? ሙሊካ ዲጌና፤ ዋጋይ አሜቲዳይ አሲ ኢዛን ዴኑ ዴማናስ ጌዲዳኮ ቱሙካ ጸሎቲሊ ዋጋ ባጋራ ቤታናኮሺን።

22 ቃሴ ጌሻ ማጸፋይ ሃይሲ አላሜይ ዉሪካ ናጋራን ቃሹቲዳይሳ አዋጄስ፤ ሄሲካ አሲ ዉሪካ ዬሱስ ኪርስቶስ አማኖን ቤቲዛ ሂደታይ አማኒዛይታስ ኡባስ አሜታናሳ።

23 ሃይሲ አማኖይ ያናፔ ካሴ ኑኒ ዋጋን ቃሹቲዲ ጎርዳን ዶስ።

24 ሄሳ ጊሻስ ኑ አማኖን ጸላና ማላ ዋጋይ ኑና ኪርስቶስኮ ጋላናስ ናጊዛዴ ማላ ጌዲዲ ናጊዴስ።

25 ሃኢ ቃሴ ሄ አማኖይ ዪዳ ጊሻስ ሃይሳፌ ጉዬ ኑኒ ዋጋ ጋርሳን ዶኮ።

ጸሓ ናይታ

26 ኢንቴ ወሪካ ዬሱስ ከርሰቶሳ አማኖን ጸሓ ናይታ።

27 ኢንቴ ከርሰቶሳራ ኢሲኖ ጊዳናስ ጸማቄቲዳይቲ ወሪካ ከርሰቶሳ ማይኦ ማላ ማይኢዳታ።

28 ኢንቴ ወሪካ ዬሱስ ከርሰቶሳን ኢሲኖ አቲን አይሁዳኔ ጊሪኬ፥ አይሌኔ ጎቃ፥ ማጫኔ አዴ ጊዛ ዱማቴሴ ዴና፤ ኢንቴ ወሪካ ዬሱስ ከርሰቶሳን ኢሲኖ።

29 ኢንቴ ከርሰቶሳይታ ጊዲኮ ኢንቴ ኣብራሃማ ዜሬላታ፤ ካሴ አማቲዳ ሂዶታ ቃላ ማላ ኢንቴ ላታናይታ።

4

1 ታ ጊዛይ ዬሌቲዳ ናይ ላታይ ኢዛስ ጊዲኮካ ኢዚ ቢዲ ላታና ጋካናስ አይሌፌ ዱማ ጊዴና።

2 ኢዛ አዋይ ጊዳ ዋዴይ ጋካናስ ኢዚ ባና ዲቺዛይታ፥ ታማርሲዛይታ ኩሼን ጋምኤስ።

3 ኑኒካ ካሴ አያና ዮኦስ ጉሓ ና ማላ ዲዛ ዋዴ ሃይሳ ሃ አላማዛ ዋጋ ጋርሳን ሃሬቲ ዴኢዶስ።

4 ጊዶ አቲን ካሴ ባ ቆፒ ዋሒዳ ዋዴይ ጋከን ጸሓይ ማጫሳፌ ዬሌቲዲ ዋጋ ናጊዳ ባ ናዛ ኑስ ዬዲዴስ።

5 ሄሲካ ኑኒ ኢዛ ናይታ ጊዳና ማላኔ ዋጋ ጋርሳን ዲዛይታ ዋዛና ማላ ሃኒዴስ።

6 ኢንቴ ኢዛ ናይታ ጊዲዳ ጊሻስ ጸሓ፥ «አቦ» ጊዲ ጸይጊዛ ባ ናዛ አያና ኑ ዋዚናን ዬዲዴስ።

7 ሄሳ ጊሻስ ሃይሳፌ ጉዬ ኔ ናፔ አቲን አይሌ ጊዳካ፤ ኔኒ ና ጊዲዳ ጊሻስ ጸሲ ኔና ባይሳ ላቲዛዴ ሂስቲዴስ።

ጋላቴያ አሳስ ጳውሎስ ቆፋ

8 ኢንቴ ጸስ ኤራናፔ ካሴ ጸስ ጊዶንታ ኤቃታስ አይሌታ።

9 ሃኢ ጊዲኮ ጸስ ኤሪዴታ፤ ቃሴካ ጸሳን ኤሬቲዴታ፤ ሂስቲን ቃሴካ ጉዬ ሲሚዲ ጌዴ ጎአይ ባይንዳ ጮ ዳቡርሲዛ ቲሚርቲኮ ዋኒ ሲሚዴቲ? ሲሚዲ ቃሴካ አይሌቴሓ ቃምባራን ዋጾታና ኮዬቲ?

10 ዱማ ጋላሳታ፥ አጊናታ፥ ዋዴታኔ ላይላታ ኢንቴ ቦንቺታ።

11 ታ ኢንቴናራ ዳቡርዳይሲ ጮ ማላ ጊዳንዴ ጋዳ ባባይስ።

12 ታ ኢሻቶ! ታ ኢንቴና መሳተዳ ማላ ኢንቴካ ታና መሳታና ማላ ታ ኢንቴና ዋሳይሰ፤ ኢንቴ ታና ኣይኮካ ቆሂቤኬታ።

13 ኢንቴ ኤሪዛ ማላ ታ ኢንቴሰ ኮይሮ መሺራቾ ቃላ ሳባኪዳይ ሳኮ ጋሶና።

14 ታ ሳኮይ ኢንቴሰ ሜቶ ጊዲንካ ታና ሳሌቲቤኬታ ዋይኮ ታና ሃራሴቲቤኬታ፤ ጊዳ ኣቲን ኢንቴ ታና ጸሳ ኪታንቻ ማላኔ ሄሳፊካ ቦላራ ዬሱስ ኪርሰቶሳ ማላ ሞኪ ኤኪዴታ።

15 ሂሰቲን ሃኢ ሄ ኢንቴ ኡፋይሳይ ኣዋ ቢዴ? ኢንቴሰ ሃኒዛዝ ጊዲዳኮ ኢንቴ ኢንቴ ኣይፊ ታሰ ኬሲ ኢማናሰ ጉዬ ጎንታይሳ ታ ኢንቴሰ ማርካታይሰ።

16 ታኒ ቱማ ኢንቴሰ ኬሳ ዮቲዳ ጊሻሰ ኢንቴሰ ሞርኬ ጊዳዲናሻ?

17 ሄይቲ ኣሳቲ ኢንቴና ባኮ ኤካናሰ ዳቡሬቴሰ ኣቲን ሎኦሰ ዳቡሬቴና፤ ኢሰቲ ኮይዛይ ኢንቴና ኦፔ ሻኪዲ ባ ኣሰ ሂሰታናሳ።

18 ሎኦሰ መንዳቲሊ ሎኦ፤ ሄሲካ ሃናናሰ ቤሲዛይ ኡባ ዋዴ ጊዲኮፊ ኣቲን ታ ኢንቴናራ ዲዛ ዋዴ ጸላ ጊደፖ።

19 ታ ናይቶ! ኪርሰቶሲ ኢንቴ ዋዚናን ጸፊቲን ታ ቤያና ጋካናሰ ኢንቴ ጊሻሰ ታ መጸታይሰ።

20 ታ ኢንቴ ጊሻሰ ቆፋን ሜቶታዲሰ፤ ታ ዳንዳይዛኮ ሃኢ ኢንቴ ጊደን ቤታዳ ኢንቴና ሎኤላ ታማርሲዛኮ ኣይ ማላ ደሳዚና!

ኣጋርኔ ሳራ

21 ኢንቴኖ ዋጋ ጋርሳን ኣቃና ኮይዛይቶ ኣኔ ታሰ ዮቲቲ፤ ዋጋይ ኣይ ጊዛኮ ሲዩቤኬቲ?

22 ኣብራሃሜሰ ኢሶይ ኣይሌይፊ ኢሶይ ቃሴ ጎቃይፔ ዬሌቲዳ ናምኡ ናይቲ ዲዛይሲ ጌሻ ማጻፋን ጸፊቲዴሰ።

23 ኣይሌይፊ ዬሌቲዳ ናዚ ኣሾ ዋጋ ማላ ዬሌቲዴሰ፤ ሃንኮ ጎቃይፔ ዬሌቲዴይሲ ኡፋይሳ ቃላ ማላ ዬሌቲዴሰ።

24 ሃይቲ ናምኡ ማጫሳቲ ናምኡ ጫቆታ ቤሲዛይታ ጊዲዳ ጊሻሰ ሃይሲ ለመሶሰ ኢማቲዴሰ፤ ኮይሮ ጫቆያ ሲና ዙማ ቦላ ጊዳሼ ኣይሌቲዳሰ ጊዲዛ ናይታ ዬሊዛር፤ ኢዛካ ኣጋር።

25 ሄሳ ጊሻሰ ኣጋራ ኣራቤ ቢታን ዲዛ ሲና ዙማ ጊሻሰ ጊዳዳ ሃኢ ዲዛ ዬራሳላሜ ካታማዮ መሳታዉሰ፤ ኢዛ ባ ናይታራ ኣይሌቲዳን ዳዉሰ።

26 ፑዴ ቦላ ሳሎን ዲዛ ዬራሳላሜይ ጊዲኮ ጎቃ ጊዳዳ ዳዉሰ፤ ኢዛካ ኦ ኣዮ።

27 «ኔኒ ዩሎንታ ማይኔዬ ኡፋዬታ! ሃኔ ሚጸታ ኤሮንታሬ! (ኢሊሊ) ጋ ዋሳ፤ አዚናይ ዲዛሪፔ አዚናይ ባይንዳሪ ናይቲ ዳሪዳ» ጌቲቲ ጌሻ ማጸፋን ጸፌቲዴሰ።

28 ሄሳ ጊሻሰ ታ ኢሻቶ! ኢንቴካ ዪሳቃ ማላ ኡፋይሳ ቃላ ናይታኮ።

29 አሾ ሼኔ ማላ ዩሌቲዳይሲ አያና ዋልቃን ዩሌቲዳይሳ ጎዲዴሰ፤ ሃኢካ ጎዴሶን ዴሰ።

30 ጊዶ አቲን ጌሻ ማጸፋይ ቃሴ አይ ጊዜ? «አይሌዮ ኢዚ ናዛራ ዲጋ፤ አይሌይ ናይ ጎቃይ ናራ ላቲና» ጌሰ።

31 ሄሳ ጊሻሰ ታ ኢሻቶ! ኑኒ ጎቃይ ናይታ አቲን አይሌይ ናይታ ጊዶኮ።

5

1 ኑና ኪርሰቶሲ ጌሺዳይ ኑኒ ጌሻቴላን ዳናሳ፤ ሄሳ ጊሻሰ ሚኒ ኤቂቴ፤ ናምእንሉ አይሌቴላ ቃምባራን ጌሎፒቴ።

2 ታ ኢንቴሰ ጊዛይሳ ዋዚናን ዋሊቴ፤ ኢንቴ ቃጸሬታና ኮይኮ ኪርሰቶሲ ኢንቴና አይኮካ ጎኤና ጋዳ ታ ጸዉሎሲ ኢንቴሰ ዮታይሰ።

3 ቃጸሬታና ኮይዛይቲ ወሪ ዋጋ ኡባ ፖላናይሲ ዶሳ ጊዶንታይሳ ታ ኢንቴሰ አሳሰ ኢሳሰ ቆንጨን ዮታይሰ።

4 ኢንቴኖ ዋጋ ናጎን ጸላና ዋዬቲዛይቶ! ኢንቴ ኪርሰቶሳፔ ሻኪቲዴታ፤ ኢዛ ኪያቴላፊካ ሃኪዴታ።

5 ኑ ቃሴ ኡፋይሳን ናጌቲዛ ጸሎቴላ ጸሳ አያና ባጋራ አማኖን ላምቴላን ናጎን ዶሰ።

6 አሲ ዩሱሰ ኪርሰቶሳን ዲኮ ቃጸሬቲን ዋይኮ ቃጸሬቶንታ አጊን አይኮካ ጎኤና፤ ጎአይ ዲዛይ ሲቆን ቆንጨዛ አማኖ ጸላ።

7 ካሴ ሎኦ ዋል ዋጾታ ሺን፤ ሃኢ ኢንቴሰ ቆጶ ጊዲዲ ቲማሰ ኢንቴ አዛዜቶንታ ማላ ኢንቴና ዲጊዳይ ኦኔ?

8 ሄሳ ማላ ባሌሶይ ኢንቴና ጾይጊዳ ጸሳፌ ጊዴና።

9 «ጉላ አርሾይ ሊጶ ኡባ ዴንሐሰ» ጌቲቲዛ ማላ።

10 ኢንቴሰ ሃራ ቆፋይ ዴና ጋዳ ታኒ ጎዳን አማኔታይሰ፤ ኢንቴሰ ቲኪ ጊዛዝ ኦሊዛይ ኦና ጊዲኮ ኢዚ ባ ፒርዳ ኡካና።

11 ታ ኢሻቶ! ሃኖ ጋካናሰ ታ ሳባኪዛይሲ አሲ አታናሰ ቃጸሬታና ቤሴሰ ጊዛዝ ጊዲዳኮ ሂሰቲን ሃኖ ጋካናሰ አዛሰ ታና ጎዲዞ? ሄሳ ማላ ጊዲዳኮ ኪርሰቶሳ ማሰቃሌይ አሳሰ ቆጶ ጊዴናኮሺን።

12 ኢንቴስ ቲኪ ጊዛዝ ኦሊዛ ኣሳቲ ጮ ዋጋራ ቃጸሬቴል ኣጊዲ ሙሌራ ቃንጺ ዬጌቶ።

13 ታ ኢሻቶ! ኢንቴ ጌሻቴላስ ጸይጌቴዴታ፤ ኢንቴ ኢንቴ ጌሻቴላ ዛሪዲ ኢንቴስ ኣሾ ኣሞ ፖላናስ ጎኤቶፍቴ፤ ሄሳፌ ኢንቴ ኢንቴ ጋርሳን ሲቆን ኢሶይ ኢሳ ማዲቴ።

14 ዋጋይ ወሪ ሺቄቲዲ ኢሲ ቃላን ቃሺቴስ፤ ሄሲካ፡ «ኔኒ ኣሴ ኔ ማላ ዶሳ!» ጊዛይሳ።

15 ጊዶ ኣቲን ኢንቴ ኢሶይ ኢሳራ ሳጼቲዛይታ ጊዲኮ ኢንቴ ኢንቴ ጋርሳን ዉሮንታ ማላ ናጌቴቴ።

ኣያናን ሲሜሬቴል

16 ሄሳ ጊሻስ ታ ኢንቴና ኣያናን ሲሜሬቴቴ፤ ቃሴካ ኣሾ ኣሞካ ፖሎፒቴ ጋይስ።

17 ኣሾይ ኣያናይ ኮዮንታዝ ኣሞቴስ፤ ኣያናይካ ኣሾይ ኮዮንታዝ ኣሞቴስ፤ ሃይቲ ኢሶይ ኢሳራ ባ ጋርሳን ኢጼቲዛ ጊሻስ ኢንቴ ኢንቴ ኮዪዳ ማላ ኦሴኬታ።

18 ኢንቴ ኣያናን ዲዛይታ ጊዲኮ ዋጋስ ሃሬቲዛይታ ጊዴኬታ።

19 ኣሾ ኦሶይ ቆንጨን ኤሬቴስ፤ ሄሲካ ላይማቴል፡ ቱናቴል፡ ላይማ ካስ።

20 ኤቃስ ጎይኖ፡ ቢታ፡ ኢጼቴል፡ ኦሽ፡ ቃናቴቴል፡ ሃንቆ፡ ባና ጸላ ዶሶ፡ ሻኬቴል፡ ዙፔቴል።

21 ሚቃይኔቴል፡ ማሶቴል፡ ኣላሜ ማዛሙሬ ዬጸሊኔ ሃይታንታ ሚሳቲዛይታ። ታኒ ኢንቴስ ካሴ ዮቲዳ ማላ ሃኢካ ኢንቴ ናጌታና ማላ ቆፍሳይስ፤ ሄሳ ማላ ዲስ ዲዛይቲ ዉሪካ ጸሳ ካዎቴል ላቴቴና።

22 ኣያና ኣይፌይ ጊዲኮ ሲቆ፡ ኡፋይስ፡ ሳርቴል፡ ዳንዳያ፡ ኪያቴል፡ ሎኤቴል፡ ኣማኔቴል።

23 ኣሽኬቴል፡ ባርካ ባና ሃር፤ ሃይታንታ ማላ ዲጊዛ ዋጋይ ባ።

24 ዬሱስ ኪርስቶሳስ ጊዲዳይቲ ኣሾ ኢዛ ኢታ ቆፋራኔ ኢዛ ኢታ ኣሞቴላራ ኢሲፌ ካቂዳ።

25 ኑ ኣያናን ዳና ኮይኮ ኣኔ ኣያናን ሲሜሬቶስ።

26 ኑኒ ኢሶይ ኢሳ ኢታስ ዴንፌሊሽኔ ቃናቴቲሼ ጮ ሜላ ጨቄቲዛይሳ ኣኔ ኣጎስ።

6

አሰ ኡባሰ ሎኦ ኦሶ

¹ ታ ኢሻቶ! ኢሲ ኣሲ ናጋራ ኦሊ ቤቲኮ ኢንቴ ቃሴ ኣያናን ሎኦ ዲዛይቲ ኢዛ ኣሽኬቴላራ ዛራናሰ ቤሴሰ፤ ጊዶ ኣቲን ኔካ ኢዛዴ ማላ ፓጮቶንታ ማላ ኔ ሁኤሰ ናጌታ።

² ኢንቴ ኢሶይ ኢሳ ዴጾ ቶሆ ቶኪቴ፤ ሄሳ ማላ ኦሶን ኪርሰቶሳ ዋጋ ፖሌታ።

³ ኢሳዴይ ኣይኮካ ሃኖንታ ዲሼ ባና ጌታሲዛ ሚሳቲኮ ሄሳዴይ ባርካ ባና ባሌሌሰ።

⁴ ኢሲ ኢሲ ኣሲ ባ ኦሶ ባርካ ፓጪ ጾሎ፤ ሄሳፌ ጉዬ ሃራ ኣሳራ ባና ጌናሶንታ ዲሼ ኢዚ ባና ጩቂሲዛዝ ዴማና።

⁵ ኢሲ ኢሲ ኣሲ ባርካ ባ ቶሆ ቶካናሰ ቤሴሰ።

⁶ ቃላ ታማርዛይ ኦኒካ ባ ታማርዳ ሎኦ ሚሻ ባ ኣሰታማሬዛራ ጊሼቶ።

⁷ ባሌቶፍቴ፤ ጸሲ ቂልጫ ኤሬና፤ ኣሲ ባ ዜሪዳሮ ኢዞ ዛሪ ማጽና።

⁸ ባ ኣሾ ኣሞ ኩንላናሰ ዜሪዛዴይ ኣሾፔ ጳዮ ማጽና፤ ኣያና ኡፋይሳናሰ ዜሪዳዴይ ጌዲኮ ኣያናፔ ሜርና ዴኦ ማጽና።

⁹ ኣኔ ኦ ሎኦ ኦሶ ኦላናሰ ኣዛሎኮ፤ ኦ ኡፋይሰ ቃንጾንታ ኣጊኮ ዋዴይ ጋኪሺን ጋኪዳ ካሐ ኦ ማጽና።

¹⁰ ሄሳ ጊሻሰ ኦሰ ዳንዳዬቲኮ ኣሳ ኡባሰ ሃራፔካ ኣማኒዛ ኣሳሰ ኣኔ ሎኦ ኦሶሰ።

ወርሴላ ዞሬኔ ሳሮካ

¹¹ ታኒ ታ ኩሼራ ኢንቴሰ ኣይ ማላ ጌታ ፒዳሌን ጸፊዳኮ ኣኔ ጾለቴ።

¹² ጮ ካሬ ባጋራ ቤታና ኮይዛ ኣሳቲ ኢንቴ ቃጸሬታና ማላ ዋልቃላና ኮዬቴሰ፤ ኢሰቲ ሄሳ ኦሊዛይ ኪርሰቶሳ ማሰቃሌ ጊሻሰ ጌዲ ጎዴቶንታ ማላሳ።

¹³ ኢሰቲ ኢንቴ ቃጸሬታና ማላ ኮይዛይ ኢንቴ ኣሾን ጩቂታናሰ ኮይዛ ጊሻሰ ኣቲን ቃጸሬቲዳይቲ ዋጋ ናጊዛይታ ጌዴቴና።

¹⁴ ቃሴ ኣላሚይ ታሰ፤ ታኒካ ኣላሚሰ ካቂቲዳ ጎዳ ዬሱሰ ኪርሰቶሳ ማሰቃሌንፔ ኣቲን ሃራን ጩቆይ ታፔ ሃኮ።

¹⁵ ቃጸሬቲን ዋይኮ ቃጸሬቶንታ ኣጊን ኢዛሰ ጎኣይ ባ፤ ጎኣይ ኦራሳ ሜዴቴሰ ጌዴላ።

¹⁶ ሃይሳ ሃ ኣዛዘዛ ካሊዛ ኡባታሲኔ ጸሳ ዴሬ ጌዲዳ ኢሰራኤሌ ኣሳታሰ ሳርቴሊኔ ማሬቴሊ ጌዶ።

17 ታኒ ዩሱሳ ማለታ ታ ኣሳቴላን ቶካዲሰ፤ ሄሳ ጊሻሰ ሃኢ ታና ኦኒካ ዋዪሴና።

18 ታ ኢሻቶ! ጎዳ ዩሱሰ ከርሰቶሳ ኣቶ ከያቴሉ ኢንቴናራ ጊዶ! ኣሚን።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b